

進天目中峯和尚廣錄表

皇帝福履裏大普慶寺臣僧善達密的理誠
惶誠恐昧死謹言臣聞佛之生去中國
十萬里其歿距今二千餘年故傳道淺
微而言禪最病拘則泥乎物誕則離乎
真真離而誕益勝故今之眩誕自我者

皆誣禪以亂其教其的傳真悟超然獨
異於是者實惟天目山佛慈圓照廣慧
智覺禪師中峯和尚明本本承嗣高峯
原妙妙嗣仰山祖欽欽嗣徑山師範範
於法系上泝臨濟義玄為十五世之祖
本距菩提達磨實二十九代之法孫也

臣謹按先師明本道德行業衣被禪林
孤光絕響振耀海寓

仁宗皇帝嘗遣近臣賜衣錫號
英宗在御渙汗繼述恩數有加及乎
文皇以臣先師之所素履簡在
聖心於是

賜謚與碑謚曰智覺塔曰法雲今復際遇
皇帝陛下聰明天從

聖智日新

道軼百王

皇建有極

崇信佛學垂護正宗遂敢輒冒

天誅復有懇請蓋自達磨傳佛心宗道盛
東土雖代有得法稱師者然具大辯才
大智慧於其教法扶衰拯溺建正摧邪
有功佛乘者亦罕見焉惟五季末明智
覺禪師延壽慨念天台慈恩賢首性相
三宗牙相矛盾乃集三宗知法之士更

相設難而以心宗旨要折中之於是著
宗鏡錄一百卷其書既行後賜入藏宋
元祐間明教禪師契嵩憫世儒闢佛太
甚而不知佛學陰禪王化遂著書曰輔
教編三卷又念

釋迦文佛至乎曹溪六祖受授而下歷代

諸師譜系不明復著傳法正宗記十二卷其書亦賜入藏今臣先師明本痛禪學之弊無如今日用救其弊以身先之其所著書因學者不能廓悟神心徹法源底每以聰明之資於古德垂示第一義諦處輒領覽爲己解也於是著信心

銘闢義解一卷每以講學之士不能無辯詰也於是著楞嚴徵心辯見或問一卷金剛般若畧義一卷別傳覺心一卷因學者不信有悟門而遂溺於邪見未得謂得未證謂證也於是擬寒山詩一百首又著幻住家訓一篇以發明真叅

實悟之旨因學者每每致問隨問而答久而成編曰山房夜話一卷東語西話一卷續集二卷語錄十卷別錄十卷於戲先師豈好辯哉蓋有不得已者也今遂總加哀錄而槩題其編曰天目中峯和尚廣錄隨表進上恭望

天慈鑒臣先師之所以立言非徼生榮非覬後福蓋以禪學之病沉冥膏肓有大醫王不忍聞見於是砥礪不切無以中其會俞湯劑不苦無以蠲其沉痾是所謂對證之良藥衛生之妙道其旨意如此逮與永明明教二師之所垂訓實相

表裏二師所著之書故宋既賜之入藏與諸佛菩薩之所宣說者並行而不悖矣伏念臣先師明本遭值

聖明恩渥周至

光寵蕃錫獨其遺言未得與永明明教之書賜入大藏以故臣夙夜憂歎懼有

墜逸伏望

皇帝陛下天地之量



日月之明容臣螻蟻之志鑒臣草芥之誠將臣所進先師明本廣錄三十卷

特賜入藏佛學幸甚臣干冒

天威下情無任激切屏營之至謹奉書隨

表上進以
聞臣僧善達密的理誠惶誠恐昧死謹
言

元統二年正月 日大普慶寺臣僧
善達密的理 上表

降賜天目中峯和尚廣錄入藏院劄
皇帝聖旨裏行宣政院准

宣政院咨元統二年正月二十六日篤

連帖木兒怯薛第二日

延春閣後咸寧殿裏有時分速古兒赤馬
札兒台大夫汪家奴院使羅鍋殿中喃

忽里火里歹等有來本院官撒迪平章
不蘭奚院使汪束攢古魯思院使左吉
院使燕京間院使桑哥失里院使喃哥
班同知輦真班同僉唆南叅議也先不
花經歷陳都事等
奏在先好師德每撰集來的文字奉

皇帝聖旨教刊板入藏經裏有來如今為這
中峯和尚悟明心地好師德的上頭奉
札牙篤皇帝聖旨他根底也立了碑來如今
它撰集來的文字都是禪宗裏緊要的
言語有如今依先例將這文字但有藏
經印板處教刊板入藏經教揭監丞撰

序加與普應國師名字俺行與省家文
書教與

宣命呵怎生養呵奉

聖旨那般者教火者賽罕院使
皇太后根底啓呵那般者麼道
懿旨了也欽此除欽遵外咨請欽依施行准

此除外使院合下仰照驗欽依施行須
議劄付者

右劄付杭州路南山大普慶寺住持
准此

元統二年五月 印日



皇帝聖旨裏杭州路餘杭縣南山大普寧寺

住持臣僧明瑞元統二年五月二十八

日蒙

朝廷差來官齎奉到

鑒

行宣政院劄付該准

宣政院咨元統二年正月二十六日欽奉

聖旨節該中峯和尚加與

普應國師名字它撰集來的文字但有
藏經印板處教刊板入藏欽此除欽遵

外咨請欽依施行准此除外使院合下
仰照驗欽依施行奉此除欽遵外臣僧
明瑞今將奉到

普應國師天目中峯和尚廣錄三十卷

謹募檀信刊為經板計三函入本寺印造

毗盧大藏經院用廣流通以此

功德恭為祝延

聖壽無疆仰願

皇圖鞏固



帝道遐昌

佛日增輝 法輪常轉者

元統三年六月 日佛智妙應廣福

大師杭州路餘杭縣南山大普寧寺

住持臣僧明瑞 謹題

天目中峯和尚廣錄序

文林郎藝文監丞叅檢校書籍事臣揭

傒斯奉 勅撰

元統二年正月庚寅朔十日己亥

上御明仁殿大普慶寺僧臣善達密的理以
其師杭州天目山故佛慈圓照廣慧智覺禪

師臣明本所撰述諸書總題曰天目中峯和

尚廣錄三十卷因奎章閣承 制學士臣沙

刺班奉表以聞願視五代末明智覺禪師延

壽所著宗鏡錄宋明教禪師契嵩所著輔教

編傳法正宗記得賜入藏

制曰可世有六日乙卯中書平章政事臣撒

迪等言昔諸高僧文字語言凡於其教有所裨輔皆得稟粹奏入大藏遂為故事如本起東南以其道為海寓倡德業純備紹隆正傳仁宗皇帝始賜號法慧復加佛慈圓照廣慧之號

英宗繼御寵賚恩數一如先朝其道臣等弊

不足以知之若其為人則頗聞其略蓋其所至四眾傾嚮悉成寶坊而本未嘗一留目焉碩尋窮山僻絕洲嶼崖巢浪宿草衣木食以自絕其聲光然而德盛而心卑身遜而名隨及已示寂文宗皇帝勅辭臣製碑禮臣定謚謚曰智覺塔曰法雲恩數至矣速陛下臨御而其徒

以其著書上塵乙覽叅會際遇豈偶然哉

宜賜其書一如故事編入大藏庶無負

國家崇尚佛乘之意臣等謹昧死以聞

制曰可其賜號普應國師仍詔臣俟斯序於書之首臣因即其書而窺之見其刊華就實因事明理而其大旨則深惟其教法隆污

殊時聲實異致不能自己其言耳故言叢林栽培滋植必以其道苟不以其道而偷安利養貪慾嗔恚是皆叢林斫伐之斧斤殞獲之霜霰耳故言其教自入中國中更元魏唐宋固嘗禁止衰息而其向上諸祖身經百罹道益昌盛譬之人身視若病然而其脉則不病

也今則異此識者得不為之寒心至於推明其法必使之斷言語絕依解無授受叅則真叅悟則實悟乃始謂之傳佛心宗其間煅煉之穩密勘辯之明確無假借無回護凜凜然烈日嚴霜可畏也已至若提倡激揚則如四瀆百川千盤萬轉衝山激石鯨吞龍變不歸

於海不已也其大機大用見於文字有如此者謹按菩提達磨十一傳至臨濟義玄玄十七傳至仰山祖欽欽傳天目原妙妙傳今明本妙之居天目坐死關影不出關二十年孤冷峭絕目瞠雲漢見者慄然本給侍左右暑寒一草衣不易妙惻然屢令紉浣垢弊不顧

也本雖土木骸形而其相好魁碩偉然一代
天人師其侍死闋晝日作務夜而禪寂剋勵
嚴苦鴈不沾席者十年師資之間究詰研窮
洞法源底乃始親承記蒞由是學者輻湊歸
之然而深自韜晦未嘗肯以師道自處也臣
復考其行錄其大致固已不可彷彿其端倪

若其細行則雖大山長谷之間其徒之耄老
名德有卒世窮年不能踐其實之萬分一者
然則本之道雖非臣所能測識然即其行以
究其言則其為書上有諸祖並行不悖陰禪
皇圖光贊 佛乘其於 聖教豈小補哉豈
小補哉謹序

天目中峰和尚廣錄摠目

- 卷第一之上 示衆
- 卷第一之下 示衆
- 卷第二 小叅
- 卷第三 拈古 頌古
- 卷第四之上 法語

- 卷第四之下 法語
- 卷第五之上 法語
- 卷第五之下 法語
- 卷第六 書問
- 卷第七 佛事
- 卷第八 佛祖贊

- 卷第九 自贊
- 卷第十 題跋
- 卷第十一之上 山房夜話上
- 卷第十一之中 山房夜話中
- 卷第十一之下 山房夜話下
- 卷第十二之上 信心銘闡義解上

- 卷第十二之中 信心銘闡義解中
- 卷第十二之下 信心銘闡義解下
- 卷第十三 楞嚴徵心辯見或問
- 卷第十四 別傳覺心
- 卷第十五 金剛般若略義
- 卷第十六 幻住家訓

卷第十七

擬寒山詩

卷第十八之上

東語西話上

卷第十八之下

東語西話下

卷第十九

東語西話續集上

卷第二十

東語西話續集下

卷第二十一

賦

卷第二十二

記

卷第二十三

箴 銘

卷第二十四

序

卷第二十五

說

卷第二十六

文 疏

雜著

卷第二十七之上

偈頌

七言長篇

卷第二十七之下

偈頌

七言長篇

卷第二十八

偈頌

五言長短篇

卷第二十九

偈頌

七言八句

卷第三十終

偈頌

七言四句

天目山佛慈圓照廣慧禪師中峯和尚

行錄

大元勅賜智覺禪師法雲塔銘

普應國師道行碑

謝 降賜中峯和尚廣錄入藏并封號

國師表

天目中峯和尚廣錄卷第一之上

叅學門人北庭臣僧慈寂 上進

示眾

延祐六年九月初六日駙馬太尉潘王王璋

奏奉

聖旨 御香入山謁師於幻住菴翼日請

師就師子正宗禪寺陞座拈香云此一瓣香

虛空包不住大地載不起臣僧明本藝向寶

爐端為祝延

今上皇帝聖躬萬歲萬歲萬歲陛下恭願

至聖至明如日如月惟福惟壽同地同天次

拈香云此香胚胎萬象化育兩儀仰祝

皇太后萬歲

皇后齊年

※

◎

皇太子千春恭願天同覆地同擎海同涵春
同育又拈香云此香名高列國價重三韓奉
為駙馬太尉瀋王廣資福壽伏願劫外乾坤
榮金枝於帝苑寰中日月茂玉葉於王庭又

拈香云此香般若為根株仁政為枝葉奉為
行宣政院使平章相國闔院官僚同增祿筭
伏願以仁以政漲佛海之波瀾為瑞為祥壯
皇家之柱石遂歛衣就坐問答不錄乃云大
道無為大功不宰大善無跡大位不居一切
處海印發光千萬古金枝挺秀訪圓通大士

於潮音洞裏買石得雲饒脩如意輪期於明
慶寺中移華兼蝶至香風奏四天之樂梵音
轟大地之雷二十載已現國王五百劫常為
世主一大藏教隨機運轉百千善行任意發
揮祝萬歲於九重保三韓於上國此是太尉
瀋王海印居士尋常行履處只如今日偕行

宣政院使平章相國王子從官高登天目下
視人寰且佛法相應一句如何指陳匝天匝
地祥雲起無古無今瑞氣騰某道行全虧病
衰蒲體隈藏巖穴惟待殞土記六載前伏承
太尉瀋王書幣下逮謂得旨南來首謁補陀
次登天目今年之夏忽聞王車從至杭繼臨

海岸親見十二面滿月慈容於潮音洞裏約
山僧見處又却不然其觀世音聖相當數年
前最初發一念時而滿月慈容當處與王之
兩目如鏡照鏡自爾凡舉一念則一觀音示
現舉百念則百圓通現前所現之聖容隨念
起處竟莫知幾千萬身豈特王心為然自車

從離京師之日自北而南三千五百里驛程
若聞若見俱使知有補陀巖人心中皆具
現觀世音菩薩之慈容此又豈數量可知耶
如是無利不現之身皆含裹於王之最初一
念而其應現又不止於今日將見且百千世
後傳王之躬詣補陀巖使觀世音自在神通

光明世世增長其無作妙用殊勝功德未易以筭數知也今乃與宣政院使平章相國及王子宰相尚書侍郎舍人宣使一行官從同時會集尋奉王旨謂一眾俱欲聞向道之說若使一一請問未免詞繁俾陞此座普為眾說記得先師高峯和尚三十年深居此山每

以一箇萬法歸一一歸何處話教人默默提起密密咨叅但不使間斷亦不為物境之所遷流亦不為順逆愛憎情妄之所障蔽惟以所叅話頭蘊之于懷行也如是叅坐也如是叅叅到用力不及處留意不得時驀忽打脫方知成佛其來舊矣這一著子是從上佛祖

了生脫死之已驗三昧惟貴信得及久遠不退轉更無有不獲其相應者所以古宿有謂但辦肯心決不相賺今日太尉王與宣政平章相國王子從官皆是夙承佛記遠種靈根而華茂果圓相逢此際豈非一時慶會千古因緣者哉又記得教中有謂若人欲識佛境

界當淨其意如虛空且淨意如虛空置之不問還識佛境界麼如一香一華一幡一幢非佛境界宮殿樓閣園林浴池非佛境界乃至光明殊勝等俱非佛境界本上座今日忍俊不禁指似去也山高水深是佛境界日上月下雲騰鳥飛是佛境界明暗色空壞空成住

三塗六趣九有四生鑪炭鑊湯諸惡苦趣是佛境界諸仁者還信得及麼當知佛境界充徧故眾生境界亦復充徧離佛境界外別無眾生境界舍眾生境界外別無所謂佛境界者極而言之迷則佛境界俱是眾生境界悟則眾生境界俱是佛境界如楞嚴謂如我按

指海印發光汝暫舉心塵勞先起此說豈有定體耶謂海印者廣周法界不於印外別容有一法而得安住一切諸法皆海印之真光含攝諸塵圓裹三際此印隨佛心量建立無異無別不增不減而眾生界亦復如是但悟迷之有間也使我廣說循環莫盡恐稽王聽

不欲詞繁記得昔日趙王訪趙州和尚州不下禪床乃問王曰會麼王云不會州曰自小持齋今已老見人無力下禪床道尊德備須還趙州不下禪床師法有在無端末後垂示大似偷心未忘不妨使人疑著爭似幻住以三千六百丈天目山爲禪床行則與王共行

坐則與王共坐或有人問其中事若何聽取一偈圓通示現潮音洞幻住深棲天目山至竟不能逃海印嘉聲千古播人寰

平江路鴈蕩幻住禪菴示衆慧劍單提日用中天然元不犯磨礮神號鬼哭喪魂膽遍野橫屍不露鋒古人與麼說話已是自傷己命

了也殊不知我王庫內無如是刀嗟夫參學之士不知此心空寂本來清淨於一切法元無取捨只貴翻身一擲抹過太虛脫體無依隨處自在更說甚麼生死涅槃真如煩惱猶如昨夢何有於我哉到這裏却不妙從空放下更就他尊宿痛鉗鎚下煅鍊一回等閑伸

出三頭六臂將從上差別因緣聲訛公案縛作一束拋在他方世界之外便乃索空雙手向鬧市門頭孤峯頂上現神通十八變使他依門傍戶者斫額有分所以達磨西來謂之單傳直指初無委曲後來法久成弊生出異端或五位君臣四種料揀三關九帶十智同

真各立門庭互相提唱雖則一期建立却不思賺他後代兒孫一箇箇渾身墮在叅天荆棘中枝上攀枝蔓上引蔓但見葛藤遍地無有出期逗到頭白齒黃忽然命根子於欲斷未斷之際返思從前知解毫髮無靈甘赴死門悔將奚及近代叢林如此參學者波蕩風靡十人而九矣於戲望他法社之興叢席之盛其可得哉間有真叅實悟底尊宿出興于世欲拯救此弊無處發藥不得已於第二門頭別開一路將箇無義味話頭放在伊八識田中只待伊奮起根本無明發大疑情猛利無間縱致喪身失命亦不放捨久久純熟自

然人法空心境寂能所忘情識盡和箇話頭一時忘記瞥爾向不知不覺處蹉口一較百雜粉碎轉得身來信口道信步行觀體純真初無揀擇全生殺於一莖草上空古今於三寸舌頭豈與他順朱填墨者同日而較其得失哉然則恁麼爲伊亦是作死馬醫了也爾

不更向這裏磨礮志氣抖擻精神一往直前以求真脫是自棄也中間多有一等好兄弟不能發決定志因做到不奈何無下手處著脚不牢便生退屈正此擬議驀地被入牽引向冊子上論量經教中引喻不待悟明自立知見直饒爾論得諦當喻得明白殊不知正

是依他作解障自悟門雜毒入心佛亦難救更有人謂我根器狹劣卒不可到先且發菩提心興普賢願兼修白業以爲由漸者此等謂之孤負己靈埋沒先德又有人謂道無言而不顯體無用而不彰便乃漁獵見聞博求勝解者此等謂之癡狂外邊走又有人謂昏

沉散亂似難屏除便乃息慮停機枯心死志坐在蒲團上如一堆朽木相似忽然忘四大虛六情以爲極則者此等謂之解脫深坑死水裏浸又有人認箇昭昭靈靈鑑覺者爲自己法身便謂山河大地不礙眼光明暗色空元非他物一認認定此等謂之喚驢鞍橋作

阿爺下領又有人向他古人垂手處妄生穿鑿謂一句是半提兩句是全提揣摩不行處喚作向上機坐脫立亡喚作末後句中間又將古人語言透漏處從頭註解口耳相傳以爲究竟者此等皆是西天九十六種之數中間差別異端不可枚舉揔而言之無他蓋爲

當人元無正念不發真心又不曾實爲生死大事兼之又不具叅學眼目別白邪正師法所以坐在裏許不肯知非遂致紅紫亂朱使他晚學初機難於趣向於是勞他先聖千緒萬端設出方便特不過爲伊解其黏去其縛耳今則我這裏也不敢自出已見更遠引古

人入道因緣爲伊證據去也要知一踏到底更無回互者但看僧問古德云學人不識佛乞師指示德云我說恐爾不信僧云和尚重言爭敢不信德云即汝便是僧云如何保任德云一翳在目空華亂墜僧遂領悟這箇豈不是一踏到底底樣子這僧自非真箇懸崖撒手直下承當安得便恁麼勒絕當時儻存毫髮許心意情識於其間便是百劫千生也無他領悟處諸人還知麼且看從頭註破學人不識佛乞師指示合取狗口我說恐爾不信作賊人心虛和尚重言爭敢不信猶自不知非即汝便是將謂有多少奇特如何保任

忽然有省乃曰和尚莫謾良遂良遂若不來見和尚泊被經論賺過一生谷乃印可遂歸罷講謂同學曰諸人知處良遂揔知良遂知處諸人不知鄉使談經論教可以了得則良遂不必扣麻谷之門爾看他末後道良遂知處諸人不知且不知底是何事更爲伊從頭註破良遂見麻谷棄却黃金抱碌甌麻谷閉門不接將謂別有長處遂乃扣門劔去久矣汝方刻舟谷問阿誰拋糠引狗擬應有省已達八刻我若不來見和尚泊被經論賺過一生更叅三十年谷乃印可胡麻斯繳良遂知處諸人不知依舊可憐生這裏豈是爾循行

十七

脚跟下好與三十痛棒一翳在目空華亂墜脫賺閻浮多少人僧遂領悟三生六十劫爾諸人還知落處麼也須學這僧向己躬下一踏到底始得要知持經論教談名說相者但看良遂座主見麻谷谷閉門不接遂次日再往谷復閉門遂乃扣門谷問阿誰遂擬應名

數墨依文解義底道理也須親見良遂悟處始得要知自負知見下視諸方者但看黃龍和尚請益慈明老人明問曰公學雲門禪必善其旨如雲門放洞山三頓棒是有喫棒分無喫棒分龍曰有喫棒分明色莊曰從朝至暮鵲噪鴉鳴皆應喫棒龍罔措遂炷香作禮

明復舉趙州勘婆話詰之龍汗下不能加答
次日又詣見明詒罵不已龍曰罵豈慈悲法
施耶明曰你作罵會那龍於言下大悟呈頌
曰傑出叢林是趙州老婆勘破沒來由而今
四海清如鏡行人莫與路爲讎明以手指沒
字龍即易以有字明領之黃龍未見慈明時

領衆行脚氣吞湖海後雲峯悅和尚知其未
到一夜激發令見慈明所以顯如是之機用
也爾諸人還知麼更聽從頭註破有喫棒分
無喫棒分點火開門照賊歸有喫棒分依舊
扶牆摸壁從朝至暮鵲噪鴉鳴皆合喫棒拖
不入了也炷香作禮墮坑落澗看趙州勘婆

話且作死馬醫詒罵不已猶自口怏怏罵豈
慈悲法施耶氣急殺人慈明當時見他恁麼
道便與索性一頓痛棒打出不惟正令全提
亦要使他光前絕後無端便向他道爾作罵
會那致使黃龍復墮泥水便道傑出叢林是
趙州少賣弄老婆勘破沒來由便是有來由

也只道得一半而今四海清如鏡那裏泊行
人莫與路爲讎猶欠悟在所以道纖毫不透
如隔鐵圍自非向他毒惡鉗鎚下揩磨淨盡
豈有了辦底時節爾更要知多聞博覽口耳
傳受者但看香巖叅馮山山問曰聞汝在百
丈先師處問一答十問一答百此是汝意解

六

識想生死根本父母未生時試道一句看巖
茫然無對屢乞馮山說破山曰我若說似汝
汝已後罵我去我說底是我底終不干汝事
嚴即焚棄平昔所看文字自誓此生作箇長
行粥飯僧乃入山結茅自處一日因芟除草
不以瓦礫擊竹作聲有省遂遙禮馮山讚云

和尚大慈恩逾父母當時若爲我說破何有
今日之事乃述頌曰一擊忘所知更不假修
持動容揚古路不墮悄然機處處無蹤跡聲
色外威儀諸方達道者咸言上上機爾看他
出詞吐氣處豈是勉強做作得來又豈是記
持學解口耳傳受得來今日索性不惜口業

更爲諸人註破瀉山道父母未生時試道一
句看賊無種相鼓籠香嚴茫然無對不欠一
絲毫屢乞說破胡餅裏討甚麼汁我說底是
我底終不干汝事將謂將謂元來元來嚴乃
焚棄文字結茅自處錯擊竹有省邪法難扶
造禮瀉山面皮厚多少若爲我說破何有今

日之事如何是今日事一擊忘所知那裏學
得來更不假修持遠在動容揚古路礙塞殺
人不墮悄然機未敢相許處處無蹤跡要眼
作麼聲色外威儀莫謗他好諸方達道者那
箇是咸言上上機承虛接響所以道向自己
曾中流出蓋天蓋地回觀見聞學解者又何

翅以十較百以千較萬矣乃至聖賢應世所
有遺言徃行皆歷代之元龜百世之師法於
此可不發深省哉是則是矣須知男兒自有
衝天志不向古人行處行且作麼生是衝天
志咄不是知音徒勞側耳
示衆瞻在前忽在後竹鷄晝啼華鯨夜吼未

了聽一言如今誰動口嗟夫學人將此一等
言句作箇相似底道理商量把自家一片潔
白田地添這般野狐涎沫點污了也却不思
古人開口處如大火聚如大風輪無個湊泊
處又如吹毛利劍等閑拈出直欲要斷人命
根此豈可以心意識十度而爲得哉若然則

十九

阿難不假再修二祖不勞斷臂何則彼阿難
二祖聰慧過人意識明了如汝所解者彼豈
未聞耶蓋是心不妙悟見地不脫若見地不
脫則動是情意識輒作一團在處依草附木
承虛接響致使上味醍醐蘊在伊不淨器中
變成毒藥一切時中如箇不解脫鬼相似見
人說心說性便乃扶籬摸壁湊泊將去纔見
有人舉起沒巴鼻換轉面皮突出牙爪處未
免意識不行便乃渾侖吞棗如此等人日用
一心中常有二主互相起滅有時緣般若則
忘世諦或緣世諦則忘般若若自不知是脚跟
下蹉過却謂我工夫未熟履踐未純而然便

乃精修白業作有漏因以爲資助又有一等
顛預佛性儻侗真如者日用遇一切境界只
作一箇道理硬自排遣乃至破律儀犯禁戒
皆無忌憚及乎弄到差別境中排遣不行處
自不知是當面著謾却謂我力量未充聞見
不廣而然便乃參求古教該博見聞又或忘

形死心停機息念以資狂慧如上二種學者
蓋爲自無正念况是打頭不曾遇著箇咬猪
狗手脚底宗師與之滌蕩坐在病中不自覺
知終日肆口而談縱舌而辯揔是隔靴抓癢
如此參學要與生死岸頭一念相應如吹網
欲滿非愚即狂也近世爲人師者往往不能

二十

窮其源底但欲學人速得知解暖熱門庭多
將箇瑞巖主人公臨濟無位真人即心是佛
他是阿誰等語與人打交輒亦不顧他立脚
未穩生恐他不能領解又向他道參底是誰
學底是誰要見本性底是誰只欲他便向這
裏認箇光影使其擊拳豎指進前退後不離

當處便是西來本意矧乎學人不識好惡墮
他窠臼如油入麵不得出頭誠可哀憫良由
不知衆生心中圓淨湛然元無汚染只爲情
生智隔想變體殊一妄瞥興萬緣各立外則
妄見山河大地明暗色空內則妄見四大五
蘊見聞知覺乃至八萬四千塵勞及與菩提

真如涅槃佛性等根皆不出此一妄而有然
此妄念若欲去除直須是工夫純熟脱落根
蒂坐斷聖凡劃然開悟不則直饒備見超二
祖慧過阿難正是坐在第八識中以識去識
以妄遣妄如避身影於日中滅眼華於空裏
徒自勞神轉成差別所以從上諸老宿不奈

伊何拈出一把折柄刀刺在伊命根上待伊
捱到轉身不得處奮命一挨卒地斷爆地折
妄消想滅見謝執忘便見森羅萬象廓爾平
沉聞見覺知當處解脫乃至併百千世界融
歸一心自然法法全真頭頭顯露然雖如是
若要向衲僧面前開口吐氣更須朝打三千

暮打八百待伊死枯體上活眼重開方有語
話分大都是無量劫中生死根本今日要與
一期和盤翻轉豈易事哉如其不爾爾但以
妄想心生妄想見忽忽草草認箇目前鑑覺
昭昭靈靈喫飯著衣開口動舌底喚作自己
又妄認山河大地鵲噪鴉鳴風動塵起處喚

作法身却不思命根未斷見地不脫坐在六
塵緣影裏不肯知非有時被人說箇不是便
乃牽引古人談玄說理處從頭印過只與麼
茅纏紙裹依稀彷彿輒過一生逗到臘月三
十日四山交逼真境現前換却眼睛從前認
底揔皆不是了也到這裏甘聽處分噬臍何

及然後招妄談般若欺罔聖賢之報百劫千
生受諸苦楚如此等事從古至今賺人多矣
豈不見古人有偈云學道之人不識真只爲
從前認識神無量劫來生死本癡人喚作本
來人本上座到這裏事不獲已更爲伊與古
人翻款去也學道之人不識真用識作麼只

爲從前認識神也不較多生死本即不問如
何是本來人喝一喝切忌錯下註脚
聖節示衆大哉乾元至哉坤元一氣含容萬
有民無得而名焉功高列聖之上德邁羣王
之先蕩蕩乎用大巍巍乎體堅龍抱九重天
上日真光垂照萬斯年大衆還知麼即日瑞

分刹土春滿寰區大毘盧頂分身優曇鉢華
吐燄以故天下稱之爲 聖人之佳節也但
生植於天地之間者莫不被其澤惟我釋氏
之流乃被其澤之尤者也何以爲然蓋孤虛
柔弱而不能自立也言孤則遠離親族不營
世家言虛則寄食檀門栖遲林麓言柔則潛

心空寂守節循規言弱則守護性真不與物
競自非 聖人不忘佛囑曲垂外護則僧園
資具安敢自稱常住而不遭陵奪於他人之
手乎由是吾儕安居暇食一時一刻咸出
聖恩雖天覆地擎不足云喻使盡形求法終
身向道至若志軀畢命亦不足以酬其萬分

之一豈容懈怠懶惰虛延白晝而更馳情於
利欲者乎茲遇 聖節曲引微忱以相勉勵
記得後唐莊宗皇帝問興化和尚云朕收中
原獲得一寶只是無人酬價化曰請陛下寶
看帝乃引手舒幞頭脚化曰君王之寶誰敢
酬價龍吟雲起虎嘯風生則不無莊宗興化

二十二

若曰酬中原寶價至竟未曾定奪 巨僧遙對
天庭輒成一偈蓋天蓋地中原寶無古無今
塞太虛價重乾坤酬未得佇看

皇化越唐虞

清明示眾春溢重山翠欲流子規啼血正綢
繆紙錢灰滿千家塚哭到斜陽恨不休大衆

這箇是清明時節之即事也豈止今日為然
去年清明也 恁麼前年清明也 恁麼又前年
清明也 恁麼乃至逆數到威音已前其鳥啼
綠樹人哭荒丘亦未嘗不恁麼也何則蓋一
妄根于自心乃不知生滅去來聚散得失皆
由妄現於妄境中祖父子孫弟兄夫婦互相

酬酢結為愛見念念攀緣至死不休良可哀
憫諸禪德箇箇入門相見時指稱生死事大
無常迅速豈外乎此耶爾但目其感慕之色
耳其哀號之聲直下不能混入靈源併歸真
際要脫他無常生死也大難此事須是著實
到這田地不涉第二念不見第二人方堪負

荷苟非能所脫落身心悟徹底自餘有一等
闡提漢趙一時狂見也隨人道無爾無我無
生無死說得也相似殊不知脚跟下紅絲線
不斷正是益增其識妄耳昔靈雲和尚舉眼
見桃花便道自從一見桃花後直至如今更
不疑香嚴和尚掃地次擊竹有聲便道一擊

共三

志所知更不假修持此二尊宿便是聞聲見
色徹見已躬底樣子蓋其多生積世叅扣祖
意乃驗於此故永嘉謂吾早曾經多劫脩不
是等閑相誑惑豈似今日不本悟明惟以狂
知妄解強陳已見屈辱先哲寧不捫心負媿
哉今日事不獲已更說一偈收起葛藤今古

清明節禁煙道人住處不如然地爐深撥枯
柴火砂罐頻煨野澗泉擊竹見桃心有契化
錢酹酒事無偏男兒未具超方眼莫道曾參
佛祖禪

重陽示衆大衆俗筵以茱萸飲酒僧舍以茱
萸喫茶理無異轍事同一家却笑陶彭澤無

錢對菊花林下道人都不顧從他時節自交
加諸禪德方嘆九旬夏滿又驚九日秋深流
光如射不可把玩已躬下事還作麼生折合
古者道參禪一著要敵生死不是說了便休
既是休不得且如何說箇休得底道理若要
休除非心悟徹凡聖一齊收備既未由悟徹

此心茱萸茶黃栗粽喫了一頓聽本上座口
切切說一上又喚作應箇時節似恁麼喚作
抱道衲子燈籠露柱忍笑不禁帶累他佛祖
俱成虛設有志丈夫終不肯如此懔懔舉起
箇所參話凜凜如一人與萬人敵相似政與
麼時轉步不得畏怯不得思筭不得指點不

得乃至種種俱不得惟有一味拌性命向前
迎敵便是佛來也與之一刀兩段胷中更無
一點顧慮更說甚麼茱萸茶黃栗粽常住辦
也得不辦也得一念子空蕩蕩虛寂寂冷冰
冰氣忿忿只有箇生死無常與所參話未能
透脫安有閑情妄隨異念耶記得汾陽和尚

道一句明明該萬象重陽九日菊華新以之
頌三玄三要且今日是重陽九日滿眼黃華
備向甚處見臨濟三玄三要如其未委則老
汾陽不免拔舌犁耕有分各請歸堂體取
結夏示衆護生須是殺干戈滿地殺盡始安
居荆棘叅天會得箇中意猶較此子鐵船水

上浮遠之遠矣此四轉語內有一語是賓有
一語是主有一語全賓是主有一語全主是
賓這裏縑素得出便見臨濟大師道有一無
位真人在赤肉團上出入諸仁者莫是護生
須是殺殺盡始安居是麼莫是會得箇中意
鐵船水上浮是麼莫是全賓是主全主是賓

是麼莫是前賓後主前主後賓是麼若恁麼
 會要見無位真人更過三生六十劫亦未敢
 相許在衆中忽有箇傍不甘座出來道靈山
 密付底少室單傳底秘魔擎底俱胝豎底雪
 峯觀底投子提底豈不是無位真人乃至現
 前大眾兩足踏地握節當曾搖麈尾鼓唇皮

做摸打樣進前退後底豈不是無位真人咄
 爾這般見解正是指鹿爲馬喚奴作郎莫說
 無位真人便是影子也未夢見在縱使爾傾
 懸河之智辯運掣電之神機自一向至無數
 句從今日說到盡未來際待伊言窮理盡處
 我則輕輕引手挾鼻向伊道料掉沒交涉既

然如是且作麼生は無位真人乃屈指數云
 今朝十五明朝十六小盡廿九大盡三十數
 到七月半却好九十日爾等諸人討甚麼碗

佛

佛

佛

佛

佛

天目中峯和尚廣錄卷第一之上 卅五末

天目中峯和尚廣錄卷第一之下

參學門人北庭臣僧慈寂 上進

示衆

師子正宗禪寺示衆所起之因既的所期之
 果必親所操之志惟真則其所詣之地不期
 實而實矣教中謂三世如來咸爲一大事因

緣出現于世欲令衆生開示悟入佛之知見
 謂佛知見者乃破生死根塵之利具也佛祖
 諦觀三界諸微塵刹滿中衆生無一刹那而
 不受生無一刹那而不變滅浩浩乎不可以
 數計也而況妄情起滅刹那不住生死之理
 豈細事哉由是佛祖哀之於大寂定中隨其

迷妄爲轉法輪依處依緣多立名字謂之華嚴法華謂之楞嚴圓覺乃至菩提涅槃真如般若正法眼藏涅槃妙心等一依此心建立名常異而體常同也名異故方便善權體同故不離本際必欲衆生悟本際越生死情妄而後已凡學者跨門靡有不以爲生死事大

無常迅速而爲辭者違扣其所以或者茫然無所加對或者謂自出母胎至命光遷謝其生不知來死不知去是生死也又或指終日竟夜念慮遷流後念倏生前念忽滅取舍去來紛然無緒寢興變化未嘗暫歇皆生死也是說不越分段變易二種生死極理原之皆

枝葉爾非根本也謂根本者性真圓明本無生滅去來之相良由不覺瞥起妄心迷失本源虛受輪轉以故教中謂迷之則生死始悟之則輪回息蓋根乎迷而本乎妄也楞嚴會上富樓那問清淨本然云何忽生山河大地此問蓋迷真起妄成立生死之因佛答以大

地山河皆如來藏乃返妄旋真破除生死之要旨也以迷故引妄入心積集倒見圓覺喻之如四方易處迷妄在眼不惟所見之色是生死以至離種種色象純見於空空亦是生死迷妄在耳不惟所聞之聲是生死乃至離聲即寂當知其湛寂無聞亦是生死以至意

緣善惡不惟惡是生死善亦未嘗不是生死積爲念慮非惟動念是生死至于息念亦是生死以緣配之不惟染緣是生死其淨緣亦是生死以覺論之不惟不覺是生死其念起即覺亦是生死仰而觀之之謂天俯而視之之謂地廣而窺之之謂法界大而量之之謂

虛空揔不出見分皆生死也當知此心未即了悟使其立地成佛要且亦在生死網中原夫生死之大欺凡壓聖籠古單今未有一法不遭其淪溺者以故目之曰大事因緣有等闡提漢聞說箇生死乃掉頭不顧遽引經書文字中相似語言謂法性清淨猶若虛空世

界壞時此性不壞圓滿湛寂迫絕動搖聲色
全真見聞不昧所謂佛身無為不墮諸數何
處更覓生死去來之跡有問生從何處來使
道水流元在海死向何處去遽謂月落不離
天似此等見解喚作喫鐵棒陷鐵圍之張本
爾若不曾向真實法中脫然超悟更於悟外

別立生涯不存窠臼豈堪於生死岸畔立得
脚牢苟或纖毫不盡未免復為勝妙境界惑
在那邊起諸異想雖曰曉了其實未然古所
謂努力今生須了却莫教未劫受餘殃又云
八十公公入場屋真誠不是小兒嬉惟有痛
以生死大事為己重任者一切時中卓卓地

單提此事蘊之方寸向三根椽下淹沒三十
年二十年宛同一日於大方之外闊跨三千
里五千里不間絲毫廢寢食忘寒暑耐寂寞
禁熬煉泯愛憎離順逆空能所融是非死盡
偷心方堪湊泊古人謂叅禪一著要敵生死
不是說了便休前輩叅禪大有樣子一一皆

三

是竿頭進步撒手懸崖豆爆冷灰死中得活
備嘗艱苦不憚勤勞挫銳解紛埋光鏟彩不
肯以小成近効而生自足之心蓋知生死根
塵大於虛空廣於法界況是歷涉多生熏鍊
成熟纖毫不盡便是鐵圍所以立志如敵萬
人一步要跨千里盡形骸面皮鐵石窮歲月

肝膽冰霜志利養於念端空名位於世表無
念尚虞滯跡有佛安得肯為非效學而能蓋
真實為生死者曾不期然而然矣今人反是
才跨門來立脚未穩以聰明之資打頭連得
箇自性離生滅真身絕去來底現成說話以
為本柄自己脚跟下未曾卒地折爆地斷底

一條生死命根置之無事甲中取性向佛祖
頂額上高揮大抹自謂禪學理應如是奈何
實地上工夫未曾親到不知據廣床說大話
打圓相卓烏藤一一皆與生死根塵交光接
影而沉心塵易壅識馬難調愛見之習潛興
貪妄之情默運輪回未斷而益熾生死未空

而愈滋藜林衰替法社荒涼未有不本於此者所謂不是說了便休斯言豈欺人哉蓋實有如是事也爾不思爲生死根塵籠絡在塗炭中一日一夜萬死萬生形飄劍戟業墜火湯改頭換面備嘗楚毒這箇都是墮生死惡道底家常茶飯無量劫來不是不曾經歷今

日要將此根深蒂固底生死牢關一回翻轉豈易事哉更若顧利害較得失擇甘辛存取舍則生死根塵又將接續去也或者謂展轉流浪且置之不問輪回生死不由超悟還有休息之時節也無對曰譬如猛風吹海欲其波浪自息豈可得乎其生死苟有自息之時

則佛祖不須與慈運悲曲施方便一至於此也是故塵沙可數而生死莫知其數量滄溟可飲而生死莫知其邊涯當知無量劫來爲生死流轉至于今身於苦於樂以昇以沉竟莫知其幾矣以迷妄所蔽不自覺知只據現量較之却似今日方從頭起當知未來泊没

浩無邊涯推其所因非天降非人與一由迷妄所致好趁今日身強力健提起箇無義味話頭猛奮精神一踏到底恁時說有生死也得說無生死也得回古風於刹那播玄機於當念如壯士屈臂師子遊行豈小根劣器者所能擬哉

示衆雲門話墮趙州勘婆唯之與阿相去幾何焦尾錦鱗躍開地網摩空俊鶴透過天羅不動一塵知落處二千年事不爭多還會麼如或不然更爲爾重下註脚記得靈實和尚頌爲道日損有偈云三分光陰二早過靈臺一點不措磨貪生逐日區區去喚不回頭爭

奈何拆東籬補西障回地軸轉天關在靈實則不無爭奈此四句遭人檢點三分光陰二早過向甚處去也靈臺一點不措磨無爾下手處貪生逐日區區去何處不稱尊喚不回頭爭奈何直得分踈不下高高峯頂行擡脚不起深深海底坐打衣不濕雪實平地上把

人埋沒撚指二百餘年今古之下乏人點檢
幻住也有一偈還有檢點者麼須早出來不
然則就與拈出去也三尺黑蜨眠暗室一雙
白鼠嚙枯藤家山咫尺無行路有底閑情逐
愛憎

解制示衆臨濟喝得口破德山棒得手折雪

五

峯是甚麼雲門乾屎橛千七百箇老骨搥開
口重重納敗闕爭似幻住一夏九十日無禪
可參無法可說把箇無義味話拋在諸人面
前指鹿爲馬證龜成鳖逗到今朝靈驗全無
露柱燈籠與禪板蒲團互相歡悅驚起日捷
連尊者忍俊不禁鐵錫敲開地獄門刹那滅

却阿鼻業諸禪德還知麼此事且置九十日
內謂之禁足謂之護生謂之安居謂之聖制
一日鉢盂兩度濕畢竟爲箇甚麼古教謂迷
之則生死始悟之則輪回息然悟之則不復
與論既曰未悟決定是迷迷之則無常生死
念念開端塵塵肇始恒河沙劫出没昇沉卒

未有了日在無常殺鬼誰管爾山中坐夏來
莫說與麼坐一夏爾若不精勤勇猛如救頭
然曲徇世情橫生妄見披襟閑證曳履高心
漁獵古今虛延歲月似與麼過得百千萬億
夏惟長業輪全虧道用今日九旬制滿三月
功圓被人問著水牯牛作麼生胡孫子作麼

生只與未結夏前宛爾無異豈不孤他佛祖
垂教天龍擁護檀信供給王臣加被者哉在
今日事不獲已更與諸人展箇寬限初發心
爲生死入道之日即是結制於中也不論九
十日九月九年十年但念念不退轉念念不
間斷念念不休息念念不棄離衆之究之決
之擇之直至心空及第脫略見聞打破漆桶
之頃便是解制之日也爾不見古教謂如一
衆生未成佛終不於此趣泥洹這箇說話固
是悲願弘深殊不知綿裏之刺蜜中之砒直
是惱人懷抱大丈夫或不趁此一期透脫自
甘流浪豈理然哉記得僧問趙州萬法歸一

一歸何處州云我在青州做一領布衫重七斤謾陳一偈以遣時緣七斤衫重出青州老趙州禪觸處周聖制九旬今日滿杖藜千里又驚秋

歲朝示衆大衆達磨大師來也還見麼見不見且止備道其來所爲何事乃言今日年新

月新日新以至森羅萬象山川草木同時俱新惟我單傳直指之道置之熊耳峯畔千餘年塵堆垢積草長醜生直是無人顧著今日乘此佳節敢借菴主拂子拄杖與之震動發揮也要一回斬新乘示因告之曰此道自虛空萬象有無情等四聖六凡各各本來具足

謂單傳傳箇甚麼直指所指何事離此道外莫別有向上事麼時老達磨不覺含羞而去雖然事無一向今日既是應箇時緣不免因行掉臂去也以拂子擊拄杖一下云諸人還見麼還聞麼直下塵消垢落影現光浮覲面相呈更無隱覆如其不薦切不得將心湊泊

舉意測量欲得混融別無方便普請諸人猛將舊年所做起底窠臼盡底掀翻只從今歲朝斬新提起所叅底無義味話頭別立生涯叅取於此三十六旬二十四氣之中也莫問大盡小盡今朝明朝綿綿不休密密無間但有片餉精神亦不得等閑虛棄直得心無異緣

念空羣妄驀忽於用意不及處劈面撞著方知日日是年朝時時是歲旦譙樓畫角幽幽清響起孤城鉅閣華鯨浩浩洪音鳴梵苑黑漆桶望空踣跳黃金圈匝地騰驤毘盧向上未聞此等風規威音那邊安有這箇消息且道是甚麼消息座上客驚槐國夢屋頭春發

少林華

開爐示衆世界闊一丈古鏡闊一丈爾還知蒲團上一箇吞不下吐不出底無義味話頭也闊一丈麼這裏一肩荷負得去便可喚火爐作古鏡喚古鏡作世界都無異致如其未爾火爐與古鏡世界與話頭相違不止三千

里何以如此蓋能所分別作障礙觀體如銀山鐵壁之堅只此便是生死輪回根本故楞嚴謂根塵同源縛脫無二識性虛妄猶若空華由塵發知因根有相相見無性同於交蘆這裏無爾動步處無爾著眼處昔安楞嚴讀到知見立知即無明本知見無見斯即涅槃

雖破句讀之其桶底子當下脫落直得七穿八穴洞見老釋迦心肝五臟直下喚古鏡作火爐不妨洞照森羅萬象喚火爐作古鏡不妨熏炙冰霜面皮洗盡見塵絞乾情浪無第二念無第二人喚南作北敲東擊西死柴頭上爛發心華水底輝騰赤燄冷灰堆裏撥出

火種毛端盤結青煙一切處和氣藹然一切處陽春煥若信手拈來安有一毫刺法與人為知為解者哉年來佛法無靈往往將根塵識妄認作真心說得宛然了無交涉記得儒人勸學有詩謂擊石乃有火不擊元無煙人學始知道不學非自然此說雖曰訓蒙於禪

學分上說得恰好何以知然謂石中有火不以智巧擊之引之則終於不遇也今人惟知石中有火未曾施半錢智巧之力擊之終日指此冷石說火之用說到眼光落地依前只是塊石頭要覓一點火為用了不可得此是不肯死心做工夫以求正悟惟記相似語言

而說禪者是也更有一等闡提人聞說石中有火急碎其石欲取其火乃至碎抹為塵終不得火却不責不以智巧求之便乃不肯信石中果有真火此是不信自心成佛之凡夫也此說且置何謂智巧勉向第二門頭立箇喻子首以信根為石次以無義味話頭為擊

石之手又以堅固不退轉志願之鐵打箇火刀乃以精勤勇猛不顧危亡之力向動靜閑忙中敲之擊之使不間斷又必待無量劫中蒙佛祖授記般若種性乾草驀忽相承是謂智巧也引起一星子延燎不已直教三千世界化為焦焰復何難哉捨此智巧未見有燒

物之火無緣而自出也記得百丈令瀉山撥火瀉撥之不得丈躬撥得之謂瀉曰爾道無這箇聲直下還著得智巧也無聊說一偈十方世界火爐閣冷灰堆裏深深撥得一星兒遽喜歡今古拈來鬧聒聒諸禪流休抹捷煉却眉毛莫便休或不如斯遭凍殺

佛涅槃日示眾昔佛於娑羅雙樹間以手摩曾普告大眾曰汝等善觀吾紫磨金色之身瞻仰取足毋令後悔世尊大似羅公照鏡取笑傍觀若曰紫磨金色之身以至蚊蚋螻蛄皆無欠少不使其各各自觀而觀於我耶又道佛身無為不墮諸數又云凡所有相皆是

虛妄遮裏還許手摩卍字曾得麼不然古德有頌謂彩雲影裏神仙現手把紅羅扇遮面直須著眼看仙人莫看仙人手中扇直饒便向摩曾告眾處洞見紫磨金色之身殊不知已是金塵入眼毒刺投心會得十成轉增情妄邇來為師為徒鮮有不墮此途轍蓋不求

正悟惟貴傍通者也諸禪德要親見世尊涅槃妙心且莫忽忽草草但於三根椽下七尺單前朝而參暮而究拌取三二十年如一人與萬人敵相似忽然冷地撞著於死枯體上頓開活眼始知紫磨金色與涅槃妙心一切智智清淨無二無二分無別無斷故擬心領

何早涉途程如太阿鋒如火聚苟非真正體裁全身涉入自餘思而知慮而解且喜沒交涉大眾即今還有能全身涉入者麼更聽說偈紫磨金色涅槃妙心未由契悟莫向外尋提所參話保護寸陰萬仞壁立志願資深冷灰豆爆握土成金纔涉意地即被魔侵波旬起舞慶喜沾襟妄陳生滅遠背玄音報諸禪德不用沉吟春風不在華枝上淺碧深紅古到今
除夜示眾欲識佛性義當觀時節因緣且只今是甚麼時節臘月二十九既非大盡乃是年窮歲極之時也古人謂生死交接之際是

臘月三十喻年盡月盡日時俱盡也且一年三百六十日內還辦得甚麼事來若辦不得未免虛喪此一年豈但虛喪此一年自無量劫來至于今日揔是虛喪過了或不便從今日脚跟下做箇立地提起所參話別立生涯猛利做向前去來年雖未過敢保又是虛喪豈但來年或不猛利精勤便百千年亦只是虛喪諸仁者虛喪時緣也不管爾以虛喪故積業愈多道力愈微何有補於出家學道之理哉奉勸諸人以鐵拄杖把殘年許多懶墮自恣昏沉掉舉一劃劃斷向明日大年初一為始奮起精進勇猛神力做一日便要見一

日功程及早討箇倒斷庶不孤出家行脚之志願也如人上山各自努力復云今夜臘月廿九處處迎新送舊惟有衲僧面前動著便成窠臼不如念一道真言消遣殘年不唧溜是大神呪是大明呪試聽五更樓上鍾百千幻法皆成就

十

湖州弁山幻住禪菴示衆生從何處來崑崙騎象舞三臺這裏見得便見四大已具來實無來四大分離去實不去乃至苦樂逆順是非得失皆是現行三昧山河大地明暗色空揔是自己家珍頭頭上明物物上顯更有甚麼生死去來之相而可分別者哉雖然如是

爾若不曾真箇和桶子底打脫一番開兩眼睛向威音王那畔冷地一覷覷破則未免被他山河大地四大五蘊是非苦樂一單單住不得自由便乃捏目生華妄陳異見即此便是生死大海中頭出頭沒不得解脫底種子直饒爾隨人道得箇不來不去底道理爭奈

爾目前前箇情見不忘動步生塵觸途成滯者何所以道參須實參悟須實悟然而生死習氣大都是無量劫中熏陶成熟不同小小若非真參實悟焉得有徹頭徹尾底時節兄弟家各各帶一箇口款道生死事大既知是一種大事因甚麼只向他禪床角頭故紙堆

裏漁獵得一言半句蘊在八識田中見人問
著便乃揚眉瞬目做模打樣以為究竟若謂
大事只消恁麼了得拈華微笑斷臂安心只
成戲劇耳又安得遺光百世照映藁林諸仁
者儼若真實要洞明此一段大事直須發大
心立大志將平生見聞情解虛妄覺知之心

拈向一壁待他曾次中空牢牢無依倚時驀
提起箇崑崙騎象舞三臺是甚麼道理這裏
須是把做一件無大極大底一等大事猛著
精神與之厮捱晝夜六時不得放舍然參禪
要具三種心第一具大信心第二具了生死
心第三具不退轉心信得及則始終不惑生

死切則用心必至不退轉則決定成就三心
既具則十二時中無虛棄底工夫既不虛棄
則念念爾心心爾塵塵爾刹刹爾忽然向用
心不及處著力不得時和箇信得及底了生
死底不退轉底一時打失當體洞明如十日
並照間不容髮說甚麼崑崙騎象舞三臺縱

饒一千七百則葛藤不直一笑而冰釋矣即
此便是真參實悟底時節恁時不妨於山河
大地四大五蘊中如香象王擺脫鐵鎖獨步
大方遊行自在豈不踴歟是則是矣更須知
有祖師門下衲僧面前換轉眼睛突出牙爪
一著子猶隔天涯在

結夏示衆大眾踞菩薩乘修寂滅行以大圓
覺為我伽藍身心安居平等性智此是二千
年外老釋迦畫地為牢與當時衆比丘禁足
安居之古制也今朝四月十五適當聖制之
辰拈出陳年曆日頭為諸人因行掉臂去也
前面一絡索且置之不論復如何是安居平

等性智然性智平等故盡十方刹土更無有
不平等者仰觀諸佛俯視衆生是謂性相平
等前觀過去後及未來是謂三際平等諸戒
定慧及嬉怒癡是謂一念平等迷而生死悟
而涅槃是謂不動平等大而虛空細而纖芥
是謂離相平等乃至見色色平等聞聲聲平

等審如是則四月十五結結亦平等七月十五解解亦平等於中九日日日平等時時平等念念平等政與麼時喚甚麼作結喚甚麼作解喚甚麼作安居不安居黃面老漢到這裏不覺全機敗露雖然事無一向爾若不曾真正向平等性智中腳踏實地頓悟一回

十二

直饒將平等二字盡虛空充塞殆徧無乃益其高下耳此事只恁麼說不過須是硬曝曝地向此九十日於無義味話上橫敲豎敲朝挨暮挨到極處敲到盡時如啞子得夢恁時不妨任意指陳喚平等作不平等亦得喚不平等作平等亦得所謂我為法王於法自在

在記得古人有偈謂護生須是殺殺盡始安居會得箇中意鐵船水上浮莫是殺生與護生一念平等麼恁麼商量瞎人眼目甚非細事更聽說偈各自歸堂九旬禁足意何殊生殺難將古制拘未到身心平等處豈應容易白安居

冬至示衆乾三連坤六斷慈明揭堂上之榜文陽未復陰已消洞山撥座元之果卓兩重公案皎如白晝千年活計瑩若澄潭金毛師子擺脫鐵鎖而奮迅遊行踏碎東西天目玉角麒麟掣斷錦繩而軒昂步驟衝開前後溪山堅冰浮野水而不知春信寄寒梅而未覺夜後燈籠眼活朝來露柱心空共發揮劫外風規同指點寰中節令諸禪德還知麼爾若道年年冬至喫齋歲歲一陽聽法鐵酸胎鐵蒺藜互相拋擲牛尾拂牛皮鼓撩亂激揚任爾鼓兩片唇皮向曲录床上說向天也得說向地也得說得陰消陽長也得說得陽消陰

十三

長也得我只管一日鉢盂兩度濕冬至寒食百單五是固是矣爾還知只箇不管底政是生死根株無常羈鎖政未曾透脫在所以道此宗難得其妙切須子細用心古今多少靈利人向一色邊立定主宰一切處禪將去禪也禪得是爾若不親向自己脚跟下卒地斷

曝地折一回殊不知和箇禪底亦不曾脫他輪回生死此事是博地凡夫立地便要向他佛祖頭上坐卧要於一刹那頃將他積劫根深帶固底輪回生死連底一翻翻轉是謂大事因緣豈口出耳入而能及之者哉如果未相應且不要人別求方便但只於十二時全

身放下單單靠取箇所參話頭日亦然夜亦然行亦然坐亦然生亦然死亦然乃至上刀山入劍林亦皆然更不生第二念只麼純一無雜挨拶將去久久純熟和箇亦然底同時脫略心空及第其在斯焉政與麼時喚一陽作六陰也得喚六陰作一陽也得喚全消是

長亦得喚全長是消亦得喚不消不長即消即長揔得可謂真正衲子本色道流遇緣即宗應時納祐又何一物能拘絆哉雖然還不喚今日作一陽來復得麼待別有消息時却來吐露久立
平江路順心禪菴示衆洞元道者從他教來

信吾道之心甚篤遽染疾而亡守一愚弘古道亦相繼長往老幻不勝哀悼其所以哀者不哀其早亡寔哀其有志于道而未及與道相應乃賣志長往今何所之耶此一著子在諸人分上了不相間須知此三人既往底消息便是諸人現在底消息諸人現在底受用

即是三人既往底受用直下論生不得論死不得舉心動念無死時無生時記得古人有問云亡僧遷化向甚麼處去這一問最親切若知得亡僧落處便是知得自已落處有等說脫空禪底見與麼說便道自性本來不生滅有甚麼來處與去處可以指陳說此話底

十四

喫鐵棒有分爾每日向蒲團上與昏沉散亂打作一團與是非憎愛馳逐無間與喜怒哀樂起滅不停與生老病死首尾相續遇順意事便乃掀眉遇違情事應時蹙頰這裏說得無生死無去來底道理麼所以黃面老爺於二千年外便乃大驚小怪目之為大事因緣

今日諸人眼眨眨地親見他三人如是爲道如是同住如是受病如是入滅即今如是無影跡可見無行處可尋既不曾與工夫相應決定未到諸佛祖大涅槃城既未到涅槃又不可遽言箇無遷無變底道理既隨遷變則即今遷向何法界中變作甚麼頭面便從這

裏不相知處奮起一片猛利決定不退轉身心向自己躬下提起箇所參底話頭孜孜而參密密而究遺寒遺暑忘寢忘食胃中念念如撞著鐵壁相似只與麼一礙礙住更不要前思後算今日也與麼明日也與麼久久不移易將見情祛識謝塵盡念消不覺不知驀

然撞透便見他三人於未出母胎時早行脚了早參禪了早成佛了早如是而往了直下更教喚誰爲病者誰爲死者誰爲迷者誰爲參禪行脚及了悟者恁是夢言皆名刺語由是永嘉謂了了見無一物亦無人亦無佛大千沙界海中漚一切聖賢如電拂審如是能

十五

與五百年外老永嘉同時如是了了見得一回則永嘉說底即我所說永嘉見底即我所見永嘉證底即我所證是謂前無釋迦後無彌勒者也然後亦無如是說者亦無如是見者亦無如是證者此是契理而說法如是故如是至理老幻雖如此說得要且亦未如是

親證爾諸人切不得便將此話記憶在心以當參學會須將箇自己所未了底一段大事橫在目前努力參取所以古人云參禪一著要敵生死不是說了便休今則菴居十餘間禪衲十餘輩皆是久參宿學誠實以此道相從矧乎檀越雖置身多事中於供給衆人之

心未嘗少間或不專心的的向道念上著到未審何福何力可以消受今日眼見他三人受病入滅底現相尚不肯痛加鞭策已躬大事又不知更待甚麼時節到來操心取辦好教爾知蹉過今日身強力健易於構取之時異日老病入身惟有一箇難字相待

端午示衆春秋夏五不書其月記史之人乃疑文闕闕不闕十字街頭石敢當恣向人前逞妖孽倒騎艾虎上高樓背挂神符施妙訣禁赤口消白舌收卷門門五色錢將謂無人能鑑別忽被無手法師劈骨搗住拽向螞蟻眼孔中却把真機都漏泄且漏泄底在甚麼

處庭中一樹石榴花曉日照開如潑血諸禪德還委這箇消息也無本色衲子自合知歸未解翻身切忌渾侖吞棗有祖已來凡示一言半句如吹毛劍如生鐵掇如木札羹如塗毒鼓無爾側耳處無爾下口處無爾著意處無爾近傍處苟非具眼在生佛已前跨步在

威音之外狹路相逢只眨得眼如風過耳似鴨聞雷諸禪德在三衣之下大衆筵中於此事剔脫不下莫教打箇不恰好換了目前境界那時應是搆之不及也且是二時供給見成百般受用便當思塵勞捨了恩愛割了僧相具了話頭聞了其所欠者惟未能因地一

十六

聾耳況是今日色力康健時節太平處處三根椽七尺單寬廣嚴淨雖常住公務有所不辦且無半點事相干涉子細思量欠箇甚麼一箇所參話提不起都緣自信不及更無第二人爲障爲礙昔文殊令善財採藥云是藥採將來財云徧觀大地無不是藥爾看他互

相酬酢了無刺語因甚諸人白日青天向蒲團上動被昏沉散亂之所纏繞直得分踈不下且道神做禍耶鬼做禍耶良久云屈原已化鯢鯨去徒使龍舟競汨羅

中夏示衆大衆四十五日前朝昏沉暮散亂四十五日後朝散亂暮昏沉政當今日在四

十五日之中試把昏沉散亂來與老僧看既無爾拈出處則真如菩提涅槃解脫亦無爾拈出處莫說爾拈不出便是於大寂定中喚起二千年外釋迦老漢來敢保其亦無拈出之理既拈不出爾喚甚麼作昏散又喚甚麼作寂照直下聖凡情盡能所障空觀體無依

當機絕待不見四十五日在前不見四十五日在後三際平等一道虛閑即今覓箇中夏亦不可得雖然此猶是途路中事若曰到家消息猶較西天十萬程諸禪德爾最初立志要爲生死大事不是說了便休須發起一片不顧生不顧死底決定志氣也不管爾前四

十五後四十五正當四十五不四十五硬曝曝地提箇所叅話任爾說是說非論長論短拍盲舉起拍盲打捱誰管今生打得徹打不徹直饒以熱鐵輪驅入刀山劒樹上一日走百千萬億而要教把所叅話須臾放下終不可得有此等志氣欲超過佛祖爲不難矣從

前做不到古人地位只是志願不真切立脚不穩當所以古人道過河須用筏學道須立志釋迦彌勒初無所長只是箇能立志願底凡夫耳昔僧問古德一念不起還有過也無德云須彌山且道與趙州青州布衫相去幾何如其未委此去四十五日後却來露箇消

息

丹陽大同禪菴高峯和尚遠忌拈香臘月初一日老和尚遠忌新建大同菴也要効年例曇華處處開狹路難回避如是展家風曾不離世諦且如何是物外相看底向年年燒此一爐香白雲不在青山外

二月旦示衆春入寒巖不可加枯株朽榦盡萌芽化工無處藏形跡紅白都開一樣華大衆一年歲事已過一月了也蒲團禪板還知覺也無鉢盂匙筯還休歇也無芒鞋竹杖還放得下也無燈籠露柱還忘境智也無如其未委爾還知前一月如此虛度若不痛以生

死無常爲己重任精勤勇猛別立生涯則後一月未免又成虛喪不消打幾箇瞌睡十二箇月特不過展轉唐捐剃髮染衣超方越俗所圖何事爾還知命存呼吸未斷之頃壯色可如奔馬或不趁此呼吸未斷之頃壯色可玩之時拌性命提起話頭與之挨拶討箇分

曉其落湯螃蟹之喻各將誰歸爾不見石鞞
居馬祖會下在厨作務次祖問子在此作麼
鞞云牧牛祖曰牛作麼生牧鞞云一回入草
去焉草拽將回祖曰子真牧牛也看他前輩
於作務之頃未嘗斯須忘此道豈似今人橫
草不拈豎草不踏二時粥飯百般受用指顧

如意聞首座打板聲厭嫌頓起嗟訝藜生不
得已走上蒲團其情猿意馬馳驟不息或不
昏沉便成散亂間有箇不忘出家本志者強
把箇所叅話提撕作主方舉話頭未完則又
被風吹別調矣似如此喚作叅玄上士不啻
鄭州出曹門較他古德造次不離者豈止霄

壤相間哉諸禪德本色道流面前不容佇思
豈許商量連得便行玄都觀裏挑千樹提得
便走杏華枝上月三更燕聲尋王謝堂上之
巢馬蹄踏劉阮溪邊之路無一草不含芳潔
無一華不帶春容錦雲騰第一義天玉浪漲
真三昧海且不涉化工底句如何指陳鷺鷥

灘上翹雙足蝴蝶園中叫一聲

佛成道日示衆玄玄絕待妙妙無依獨露真
常全彰至體名不得狀不得雪老冰枯理無
礙事無礙天荒地迥萬里雲收午夜四方星
燦長空揭開威音那畔腦門圓陀陀光爍爍
獨瞎觸腰背後眼孔淨凜凜赤條條勒回三

萬劫風飛雷厲之神機突出五千軸海涌雲
屯之寐語大眾釋迦老子來也即今在諸人
眼睛裏仰見明星頂額上成正等覺爾諸人
還覺眉毛動也無如其未委各請歸堂將箇
所叅底無義味話拍盲提起重整精神默默
自看第一不得祛昏敵散第二不得捨妄求

十九

真第三不得愛聖憎凡第四不得將心待悟
第五不得厭生離死第六不得樂寂嫌喧第
七不得順己違他第八不得藏形避影第九
不得揀緣擇境更有第十箇不得未易與人
說破直待爾似黃面老漢夜半洞見明星一
遍如啞子得夢更不待本上座切切也記得

前輩謂古之天地日月猶今之天地日月古之萬物情性猶今之萬物情性天地日月固無變也萬物情性固無易也道胡爲而獨變乎審如其說二千年外所學之道即是今日所學之道今日所悟之道即是二千年外所悟之道未嘗有毫髮異爾還知黃面老漢棄

萬乘之尊榮如棄弊屣受六年之飢凍如處宮室及至四十九年轉法輪時惟棲身樹下丐食檀門而已豈似今日安居暇食指顧如意猶自生嫌要與釋迦同證同入未知其可也咄白日青天莫寐語好珍重

吳江州太湖簡村順心禪菴高峯和尚愍忌

拈香順心菴裏太湖中央俄然逢愍忌卅相木能忘大衆高峯老和尚來也雨蒸苗葉綠風撼稻花香

師子巖東岡幻住菴中秋示衆天上月水中月光漾漾與誰說今宵幸遇中秋節記得靈山話曹溪指南泉翫寒山比將謂廣寒殿裏

別無人元來揔是弄巧翻成拙竹影飾金瑤堦積雪盡謂一輪光皎潔那知今夜圓後夜缺有箇譬喻試聽說三十夜止有一夜圓此圓時如諸禪德之精勤勇猛也三百六十夜止有一夜是中秋此中秋之月如諸禪德於精勤勇猛中打成一片之時也奈何精勤時

少懈怠時多又奚止於一暴十寒而已哉雖三百六十夜遇此良宵其或癡雲驟起迷霧橫陳覲體昏昏依舊沒交涉無始時來揔是恁麼蹉過昔人有喝火口號謂日間鬧炒炒夜間靜悄悄可惜好光陰一時都過了照顧火燭時聞者多有警省本上座對此中秋

之月亦有箇口號勉爲大衆舉似天上月月二十九夜缺只有今夜圓莫教雲霧攝攝不攝貶得眼來天又明寬著程途且待三生六十劫

遇雪示衆一片兩片飛入人間尋不見三尺五尺積向茅簷難辨的銀象三千界靈瑞身

光有空皆徧玉龍八百萬敗殘鱗甲無地可埋梅華之恨獨深漁叢之歸未晚且道與蒲團禪板邊坐堆堆底人有何交涉古者道今日雪下叢林有三種僧一種向被位頭究明自己一種向經案上吟詠雪詩一種向火爐角說喫堂供此三種僧那箇合受人天供養

合受不合受置之勿論諸禪德備還知結雨為雪凝水為冰底道理麼然結雨為雪固是造物變化宜乎不知如凝水為冰遠以流注之質頓成堅礙之形雖金石不可與較其固請以喻明之佛性猶水也以無量劫中迷妄之寒氣念念凝合由是結佛性之水為冰也

且政當冰時未嘗不具佛性之水奈何迷妄之寒交結未化雖全體是水而不得為流注灌溉之用耳或不以智慧之日融之安有自化之理如是觀察向道之念可得而免諸或謂古人相逢彈指便解知歸豈必待奮神力下苦工而後然哉爾殊不知或不曾奮神力

下苦工於曩昔任爾相逢彈破指頭也無爾知歸之理未有一佛一祖不因智慧之日融化迷妄之寒冰而能復其佛性之水也今日一箇所叅話信得及處靠得穩時豈非真智慧耶一旦工夫熟時節至千丈冰山也是水萬尋雪嶺也是水滔滔然流歸佛性之海任

爾空中積雪火裏生冰未聞凍合無邊之海諸禪德莫道本上座長於譬喻蓋法理如是也更聽一偈凍雲四合雪漫漫孰解當機作水看只為眼中花未瞥啓窓猶看玉琅玕元宵示眾須彌燈王如來與藥師琉璃光佛昨夜在十字街頭相遇乃携手看鰲山燈火

忽撞見箇屠眉雪頂老漢向百眾人前說四句偈謂惟心即佛佛惟心此話相傳古到今對面不知燈是火區區徒向外邊尋時二如來忍俊不禁乃厲聲曰爾說也是惟欠悟在只箇即心是佛即佛惟心說與三歲小兒悉皆領會奈何不悟說食不療飢也請問悟時

消息乃曰試以喻明有人失去徑寸之珠雖百千兩金不足與較其價之輕重使此珠不獲雖萬死莫酬其尋求之心鏤之肺肝刻之心脊形之夢寐貫之見聞念念不忘孜孜不捨一日不獲則一日之念不休一年不獲則一年之心不廢愈不見愈精勤益不獲益勇

銳乃至情消想竭思苦神窮寒暑兩忘寢食俱廢積年累歲正於無可捉摸處驀忽入手圓陀陀光漾漾其三十年馳求之心一時頓息是謂悟也其尋覓此珠於心勤形瘵之際豈非參乎忽頓見此珠於神明意朗之頃豈非悟乎苟不因參尋之難安有此悟獲之喜

也與論至此忽被箇傍不甘底一喝喝散惟見燈自是燈火自是火樓臺突兀車馬交馳華敷井井金蓮燄續條條玉燭胡張三黑李四萬人海裏醉扶歸查沙鬼大齋郎百戲場中狂未歇正恁麼時且不涉悟迷共樂昇平底句如何舉似琉璃滿腹藏明月菡萏渾身

三

放寶光

除夜示衆四時與八節循環十二月今夜盡破除禪流瞥不瞥若瞥則陳年曆日不用檢尋不瞥則明日新條也須甄別東村王老化紙錢後巷竹聲俱爆裂窮神無地可送福運有天難接巖前枯木糝銀華庭際嫩條抽玉

葉將謂陽春已發生子細看來盡是殘冬雪諸禪流還知今夜舊歲去不去明日新年來不來底消息麼如其未委往往以百年壽終喚作臘月三十夜地黑天昏胡鑽亂撞正此時也蒲團上生鐵脊骨尋常豎立不牢口唇邊無義味話平昔提掇不起况是年窮月盡

日了時空再欲如之若何決定噬臍無及矣殊不知別有箇轉身路子直是奇特備但守取箇所參話不得放捨須信來朝更有新條在惱亂春風卒未休或謂傳燈錄一千七百單一人皆是言外知歸迎刃而解初不聞有做工夫看話頭之說在此自年朝至歲暮其

切切不絕口惟是說看話頭做工夫不但遠背先宗無乃以實法綴繫於人乎爾說得也是一則老僧不具此驅耕奪食換斗移星之辣手其奈諸方不觀人之根性速於求人多是鑽腋插羽急欲其高飛遠舉奈何畫虎不成反類狗也此事大難其人謂看話頭做工

廿三

夫固是不契直指單傳之旨然亦不曾賺人落草最是立脚穩當悟處親切縱使此心不悟但信心不退不轉一生兩生更無不獲開悟者如傳燈錄中許多言外知歸之士焉知其不自夙生脚踏實地做來古者謂未見有天生彌勒者是也幻人見解止於此爾若要

一超直入不為實法所綴明朝三百六十日又從頭起儘有光陰今夜權且收起葛藤珍重浴佛日示衆大衆盡十方世界是無憂樹悉達太子即今下生一手指天一手指地諸人還見麼乃云天上天下惟吾獨尊諸人還聞

麼如其不見不聞本上座贏得熟瞞諸人去也碧芙蕖紅芍藥結成越樣華亭黑斑豆赤沙糖煎就異常香水鼠尾巴短長一尊佛相牛眼睛大小一柄杓頭普請諸人同時灌沐喚作報德有德皆報喚作酬恩無恩不酬然報德酬恩且置之不問只如二千年外九龍

吐水所浴底與今日衆手所澆底是同是別若道同孤負釋迦若道別孤負自己且釋迦老子黃金面具生鐵心肝他管爾孤負不孤負但是爾自己等閑孤負則未免虛生浪死極未來際安有解脫之期為諸人這一念子不能管地帶累這老漢捨兜率降王宮入母

胎示人世造妖捏怪大抹高揮曲盡化儀老婆心切豈謂諸人逗到今日轉增迷倒沉酣憎愛結縛死生孤負萬端不可枚舉爾還知三根椽七尺單一鉢香炊九條田服盡是這老漢積劫累世指天指地中流出更不肯奮起一片決定不退轉正志翻身跳上破蒲團

猛提起箇無滋味話一踏到底豈更有別方便耶今日這箇浴佛之杓柄即是出生死險道之梯航斬輪轉根株之劔刃豈戲劇哉况是寶爐散蒼蘊之雲蠟炬吐優曇之穗梵音宣而雷動森羅萬象共證圓聞禪影移而雨傾塵刹十方同躋正覺所以云未離兜率已

北四末

降王宮未出母胎度人已畢直下安有一毫刺法與人為知為解涉見涉聞雖然只如四月初八日已前還有這箇消息也無不因則足曾三獻那得連城價倍高

天目中峯和尚廣錄卷第一之下

天目中峯和尚廣錄卷第二

韓三

叅學門人北庭臣僧慈寂

上進

小叅

瞿運使霆發卒哭藥師道場對靈小叅大道只在目前要且目前難覩欲識大道真體不離聲色言語只如都運相公昨自皇慶元年

韓三

十二月二十六日捐館至今年四月初七日其一百日內鼓螺互應金石交宣豈非聲耶華果委陳香燈羅列豈非色耶遍演金經廣宣玉偈豈非言語耶且聲色言語觀體全彰却喚甚麼作大道若以聲為大道聲自是聲若以色為大道色自是色若以言語為大道

言語自是言語與麼分析將來古人話似作兩橛這裏檢點得出便見我都運相公與藥師如來握手共遊於一十二重清淨願海以眾寶光明而作佛事俾盡大地眾生不越一念俱成正覺到這裏既無聲色可求亦何言語可取揔只是箇大光明藏如其不委更為

下箇註脚良久云天共白雲曉水和明月流復舉石頭和尚問龐居士云子學道以來日用事作麼生居士呈偈曰日用事無別惟吾自偶諧頭頭非取舍處處沒張乖朱紫誰為號丘山絕點埃神通并妙用運水與搬柴且如何是日用事茲向第二門頭曲為註脚